

CINNEADH CUR CHUN FEIDHME (AE) 2023/687 ÓN gCOIMISIÚN
an 24 Márta 2023

maidir le síneadh a chur leis an ngníomhaíocht a rinne Aireacht na hÍsiltíre um Bonneagar agus um Bainistiú Uisce lena gceadaítear an táirge bithicéideach Biobor JF a chur ar fáil ar an margadh agus lena gceadaítear a úsáid i gcomhréir le Rialachán (AE) Uimh. 528/2012 ó Pharlaimint na hEorpa agus ón gComhairle

(a bhfuil fógra tugtha ina leith faoi dhoiciméad C(2023) 1865)

(Is é an téacs Ollainnise amháin atá barántúil)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) Uimh. 528/2012 ó Pharlaimint na hEorpa agus ón gComhairle an 22 Bealtaine 2012 maidir le táirgí bithicéideacha a chur ar fáil ar an margadh agus a úsáid ⁽¹⁾, agus go háirithe an tríú fohmhir d'Airteagal 55(1) de,

De bharr an mhéid seo a leanas:

- (1) An 19 Deireadh Fómhair 2022, ghlac Aireacht na hÍsiltíre um Bonneagar agus um Bainistiú Uisce (“údarás inniúil na hÍsiltíre”) cinneadh i gcomhréir le hAirteagal 55(1), an chéad fhomhír, de Rialachán (AE) Uimh. 528/2012, ionas go gceadófar an táirge bithicéideach Biobor JF a chur ar fáil ar an margadh agus a úsáid ag úsáideoirí gairmiúla chun cóireáil fhrithmhiocróbach a chur ar umair bhreosla agus ar chórais bhreosla aerárthaí go dtí an 2 Márta 2023 (“an ghníomhaíocht”). Chuir údarás inniúil na hÍsiltíre an Coimisiún agus údarás inniúla na mBallstát eile ar an eolas faoin ngníomhaíocht agus faoin údar a bhí léi, i gcomhréir le hAirteagal 55(1), an dara fohmhir, den Rialachán sin.
- (2) De réir na faisnéise a chuir údarás inniúil na hÍsiltíre ar fáil, bhí gá leis an ngníomhaíocht chun an tsláinte phoiblí a chosaint. Miocrorgánaigh, amhail baictéir, músacán agus giosta, a fhasann in uisce síothlaithe agus a úsáideann hidreacarbóin sa bhreosla atá ag an gcomhéadan breosla agus uisce chun iad féin a bheathú, is iad is cúis le héilliú miocróbach umar breosla agus córas breosla aerárthaí. I gcás nach gcuirtear cóireáil ar éilliú miocróbach umar breosla agus córas breosla aerárthaí, d'fhéadfadh mífheidhmeanna ó thaobh inneall an aerárthaigh de teacht chun cinn agus aeracmhainneacht an aerárthaigh a chur i mbaol, rud a chuirfeadh sábháilteacht paisinéirí agus criúnna i mbaol. Mar sin, tá sé ríthábhachtach éilliú miocróbach a chosc agus é a chóireáil tráth an bhraite chun fadhbanna oibríochtúla aerárthaí a sheachaint.
- (3) Is éard atá i mBiobor JF 2,2'-(1-meitilrímhheitiléindé-ocsa)bis-(4-meitil-1,3,2-dé-ocsaaboranán) (uimhir CAS 2665-13-6) agus 2,2'-ocsaibios (4,4,6-trímhheitil-1,3,2-dé-ocsaaboranán) (uimhir CAS 14697-50-8) mar shubstaintí gníomhacha. Is táirge bithicéideach é Biobor JF, táirge bithicéideach de chineál táirge 6, is é sin “leasaithe le haghaidh táirgí le linn dóibh a bheith á stóráil” mar a shainmhínítear in Iarscríbhinn V de Rialachán (AE) Uimh. 528/2012. Ní dhearnadh meastóireacht ar 2,2'-(1-meitilrímhheitiléindé-ocsa)bis-(4-meitil-1,3,2-dé-ocsaaboranán) agus 2,2'-ocsaibios (4,4,6-trímhheitil-1,3,2-dé-ocsaaboranán) chun gur féidir iad a úsáid i dtáirgí de chineál táirge 6. Ós rud é nach liostaítear na substaintí sin in Iarscríbhinn II a ghabhann le Rialachán Tarmligthe (AE) Uimh. 1062/2014 ón gCoimisiún ⁽²⁾, ní luaitear iad sa chlár oibre chun scrúdú córasach a dhéanamh ar gach substaint ghníomhach atá ann cheana i dtáirgí bithicéideacha, clár oibre dá dtagraítear i Rialachán (AE) Uimh. 528/2012. Dá bhrí sin, níl feidhm ag Airteagal 89 den Rialachán sin maidir leis na substaintí sin agus ní mór iad a mheasúnú agus a fhorghnó sular féidir táirgí bithicéideacha ina bhfuil na táirgí sin a údarú ar an leibhéal náisiúnta.
- (4) An 28 Deireadh Fómhair 2022, fuair an Coimisiún iarraidh réasúnaithe ó údarás inniúil na hÍsiltíre chun síneadh a cheadú don ghníomhaíocht i gcomhréir leis an tríú fohmhir d'Airteagal 55(1) de Rialachán (AE) Uimh. 528/2012. Rinneadh an iarraidh réasúnaithe ar bhonn na himní atá ann go bhféadfadh sé go mbeadh sábháilteacht aeriompair fós i mbaol de bharr éilliú miocróbach umar breosla agus córas breosla aerárthaí, agus ar bhonn na hargóinte go bhfuil Biodor JF riachtanach chun cur i gcoinne an éillithe mhiocróbaigh sin.

⁽¹⁾ IO L 167, 27.6.2012, lch. 1.

⁽²⁾ Rialachán Tarmligthe (AE) Uimh. 1062/2014 ón gCoimisiún an 4 Lúnasa 2014 maidir leis an gclár oibre chun scrúdú córasach a dhéanamh ar gach substaint ghníomhach atá ann cheana i dtáirgí bithicéideacha, clár oibre dá dtagraítear i Rialachán (AE) Uimh. 528/2012 ó Pharlaimint na hEorpa agus ón gComhairle (IO L 294, 10.10.2014, lch. 1).

- (5) De réir na faisnéise a chuir údarás inniúil na hÍsiltíre ar fáil, an t-aon táirge bithicéideach malartach amháin a mhol monaróirí aerárthaí agus monaróirí inneall aerárthaí maidir le héilliú miocróbach a chóireáil (Kathon™ FP 1,5), tarraingíodh siar ón margadh é i mí an Mhárta 2020 de bharr aimhrialtachtaí troma i bhfeidhmiú na n-inneall aerárthaí a tugadh faoi deara tar éis a gcóireála leis. Mar sin, is é Biobor JF an t-aon táirge amháin a mholann monaróirí aerárthaí agus monaróirí inneall aerárthaí le haghaidh na húsáide sin.
- (6) Mar atá léirithe ag údarás inniúil na hÍsiltíre, an nós imeachta malartach chun éilliú miocróbach atá ann cheana a chóireáil, is é sin baint de láimh a dhéanamh laistigh den tanc, níl sé sin indéanta i gcónaí. Thairis sin, dhéanfaidh cóireáil den chineál sin na hoibrithe a nochtadh do gháis thocsaineacha agus dá bhrí sin ba cheart í a sheachaint.
- (7) De réir na faisnéise a soláthraíodh don Choimisiún, tá bearta déanta ag monaróir Biobor JF ionas go mbeidh gnáthúdarú ann le haghaidh an táirge. Tá coinne leis go gcuirfear iarratas isteach i lár na bliana 2023 le haghaidh fhormheas na substaintí gníomhacha atá i Biobor JF. Formheas na substaintí gníomhacha agus údarú an táirge bhithicéidigh ina dhiaidh sin, is réiteach buan a bheadh ann le haghaidh na todhchaí, ach theastódh tréimhse ama shuntasach chun na nósanna imeachta sin a chur i gcrích.
- (8) Easpa rialaithe ar éilliú miocróbach umar breosla agus córas breosla aerárthaí, d'fhéadfadh sin sábháilteacht aeríompair a chur i mbaol, agus ní féidir an baol sin a shrianadh go leordhóthanach trí tháirge bithicéideach eile a úsáid nó trí mhodh eile. Dá bhrí sin, is iomchuí cead a thabhairt d'údarás inniúil na hÍsiltíre síneadh a chur leis an ngníomhaíocht.
- (9) Ós rud é go ndeachaigh an ghníomhaíocht in éag an 2 Márta 2023, ba cheart feidhm chúlghabhálach a bheith ag an gCinneadh seo.
- (10) Tá na bearta dá bhforáiltear sa Chinneadh seo i gcomhréir le tuairim an Bhuanchoiste um Tháirgí Bithicéideacha,

TAR ÉIS AN CINNEADH SEO A GHLACADH:

Airteagal 1

Maidir leis an ngníomhaíocht lena gceadófar an táirge bithicéideach Biobor JF a chur ar fáil ar an margadh agus lena gceadófar a úsáid ag úsáideoirí gairmiúla chun cóireáil fhrithmhiocróbach a chur ar umair bhreosla agus ar chórais bhreosla aerárthaí, féadfaidh Aireacht na hÍsiltíre um Bonneagar agus um Bainistiú Uisce síneadh a chur léi go dtí an 3 Meán Fómhair 2024.

Airteagal 2

Is chuig Aireacht na hÍsiltíre um Bonneagar agus um Bainistiú Uisce a dhírítear an Cinneadh seo.

Beidh feidhm aige ón 3 Márta 2023.

Arna dhéanamh sa Bhruiséil, an 24 Márta 2023.

Thar ceann an Choimisiúin
Stella KYRIAKIDES
Comhalta den Choimisiún
